

CONVENIO DE COLABORACIÓN ENTRE A CONSELLERÍA DE PRESIDENCIA, XUSTIZA E DEPORTES E A FEDERACIÓN DE ASOCIACIÓN DE PERSOAS XORDAS DE GALICIA (FAXPG)

Santiago de Compostela, 2026

Dunha parte, Diego Calvo Pouso, conselleiro de Presidencia, Xustiza e Deportes, en virtude do seu nomeamento a través do Decreto 44/2024, do 14 de abril de 2024 e do establecido no Decreto 136/2024, do 20 de maio, polo que se establece a estrutura orgánica da Consellería de Presidencia, Xustiza e Deportes, no exercicio das facultades que lle confire o artigo 34 da Lei 1/1983, do 22 de febreiro, reguladora da Xunta e da súa Presidencia.

Doutra parte, María Alonso Mesía, en condición de presidenta da Federación de Asociacións de Persoas Xordas de Galicia (FAXPG), actuando en nome e representación desta.

Ambas as dúas partes actúan no exercicio dos seus respectivos cargos, coa representación legal que ostentan, e recoñécense mutuamente capacidade para se obrigaren nos termos do presente convenio.

EXPOÑEN

Primeiro.- As persoas xordas e xordo cegas enfróntanse diariamente con barreiras de comunicación, entendendo estas, segundo o artigo 3.d).2º da Lei 10/2014 do 3 de decembro, de accesibilidade de Galicia, como "*impedimentos*



para a expresión e recepción de información ou mensaxes, sexa por comunicación directa ou a través dos medios de comunicación", que limitan o seu acceso ao entorno físico, produtos, servizos, información e comunicacións, impedindo a súa participación plena e efectiva na sociedade, en igualdade de condicións.

A Lingua de Signos permite ás persoas xordas e xordo cegas unha completa comprensión e expresión de mensaxes. Trátase dunha lingua propia en toda a súa extensión, estruturada, con características lingüísticas e que se constitúe como vehículo de transmisión de información efectivo. O coñecemento desta lingua por parte das persoas xordas e xordo cegas favorece a súa posibilidade de interacción co medio que lles rodea, pero este medio vese reducido na medida en que a maioría das persoas que o integran descoñecen a Lingua de Signos e os contornos non se adaptan ás súas necesidades específicas de comunicación.

Segundo.- A Constitución Española establece no seu artigo 9.2 que corresponde aos poderes públicos promover as condicións para que a liberdade e a igualdade dos individuos sexan efectivas. Tamén o Estatuto de Autonomía de Galicia recolle no seu artigo 4.2 a mesma obriga.

Por outro lado, o Real decreto lexislativo 1/2013, do 29 de novembro, polo que se aproba o Texto refundido da Lei xeral de dereitos das persoas con discapacidade e da súa inclusión social, establece, no seu artigo 22, que as persoas con discapacidade teñen dereito a vivir de forma independente e a participar plenamente en todos os aspectos da vida. Para iso, os poderes públicos adoptarán as medidas pertinentes para asegurar a accesibilidade



universal, en igualdade de condicións coas demais persoas, nas contornas, procesos, bens, produtos e servizos, o transporte, a información e as comunicacións, incluídos os sistemas e as tecnoloxías da información e as comunicacións, así como os medios de comunicación social e noutros servizos e instalacións abertos ao público ou de uso público, tanto en zonas urbanas como rurais.

Do mesmo xeito, a Convención Internacional sobre dereitos das persoas con discapacidade, aprobada o 13 de decembro de 2006 e ratificada por España o 23 de novembro de 2007, establece no seu artigo 21 que os Estados membros da Unión Europea deberán *"aceptar e facilitar a utilización da lingua de signos, o Braille, os modos, medios, e formatos aumentativos e alternativos de comunicación e todos os demais modos, medios e formatos de comunicación accesibles que elixan as persoas con discapacidade nas súas relacións oficiais"*.

Pola súa parte, a Lei 27/2007, do 23 de outubro, pola que se recoñecen as linguas de signos españolas e se regulan os medios de apoio á comunicación oral das persoas xordas, con discapacidade auditiva e xordo cegas, no seu artigo 12.1, establece que as Administracións públicas competentes promoverán a prestación de servizos de intérpretes en lingua de signos española e/ou nas linguas de signos propias das comunidades autónomas se as hai, no caso de que así se solicite previamente, para as persoas que sexan usuarias da mesma, ao obxecto de facilitar as relacións das persoas xordas, con discapacidade auditiva e xordo cegas coas Administracións públicas.



Terceiro.- O Decreto 136/2024, do 20 de maio, polo que se establece a estrutura orgánica da Consellería de Presidencia, Xustiza e Deportes atribúe a este departamento, entre outras, as competencias en materia de relacións institucionais e parlamentarias. Ao mesmo tempo, unha das liñas prioritarias da consellería é o fomento das actividades que, promovidas por entidades sen ánimo de lucro, presten apoio e fomenten a integración social dos colectivos con discapacidade en orde a acadar as condicións para que a liberdade e a igualdade das persoas sexan reais e efectivas. Para tal efecto, a Consellería de Presidencia, Xustiza e Deportes ten interese en que todos os actos institucionais cheguen en condicións de igualdade a todos os colectivos.

Cuarto.- A Federación de Asociacións de Persoas Xordas de Galicia (FAXPG) é unha entidade sen ánimo de lucro fundada no ano 1979 e declarada de utilidade pública en 2005. A súa personalidade xurídica é a dunha federación, composta por sete asociacións de persoas xordas e unha das familias de persoas xordas na Coruña, Santiago de Compostela, Ferrol, Lugo, Ourense, Pontevedra e Vigo. Ten como misión principal acadar o desenvolvemento integral das persoas xordas de Galicia, en condicións de accesibilidade universal, preservando a LSE como valor esencial e está inscrita no Rexistro de Asociacións co número 107 e no Rexistro Único de Entidades Prestadoras de Servizos Sociais da Xunta de Galicia co número E0204.

De forma específica, a FAXPG ten como un dos seus fins estatutarios "*fomentar a accesibilidade universal das persoas xordas e xordo cegas en todos os contornos, públicos e privados, asegurando o pleno acceso á información e á comunicación*". Neste senso, a FAXPG fomenta a autonomía e a independencia das persoas



xordas e xordo cegas a través de actuacións orientadas á eliminación das barreiras de comunicación en todos os ámbitos e, de forma específica, nos contornos públicos e institucionais. Para isto último, o principal instrumento configúranlo as persoas intérpretes de lingua de signos española e guías intérprete de persoas xordo cegas (ILSE-GI), profesionais que interpretan e traducen a información da lingua de signos á lingua oral e viceversa, co fin de asegurar a comunicación entre as persoas xordas e xordo cegas, que sexan usuarias desta lingua, e o seu contorno social.

En virtude do exposto, as partes que asinan este convenio acordan o seguinte,

CLÁUSULAS

Primeira.- OBXECTO

O obxecto do presente convenio de colaboración entre a Consellería de Presidencia, Xustiza e Deportes e a FAXPG é o fomento da accesibilidade das persoas xordas e xordo cegas, en relación coas actividades institucionais que se leven a cabo no ano 2026, dirixidas á poboación xeral ou a colectivos específicos de todas as áreas do Sector Público Autonómico.

Segunda.- OBRIGAS DA CONSELLERÍA DE PRESIDENCIA, XUSTIZA E DEPORTES

A Consellería de Presidencia, Xustiza e Deportes para compensar os custos que deriven da realización das actividades obxecto do convenio aportará a cantidade



de 5.000,00 € con cargo á aplicación orzamentaria 2026.05.05.121C.640.0 (código de proxecto: 2015 00120).

Terceira.- OBRIGAS DE FAXPG

A FAXPG asume o compromiso de colaborar co departamento correspondente, facilitando os medios persoais necesarios cara a garantir o acceso á información facilitada nos actos institucionais da Xunta de Galicia ao colectivo incluído no ámbito de aplicación da federación.

Para acreditar o cumprimento das cláusulas deste convenio, a FAXPG entregará á Consellería de Presidencia, Xustiza e Deportes a seguinte documentación, no momento da xustificación do mesmo:

1. Un certificado, asinado por persoa responsable onde se exprese que por parte da federación se realizou a totalidade do obxecto do convenio.
2. Unha memoria xustificativa das actuacións realizadas.

Ademais a FAXPG comprométese a realizar as seguintes accións:

- Difundirá na súa páxina web todos os actos que se desenvolvan baixo o presente convenio de colaboración.
- Ofrecerá dúas accións formativas de lingua de signos española en períodos non lectivos ao persoal da Consellería de Presidencia, Xustiza e Deportes.
- Facilitará os medios persoais necesarios para levar a cabo as actividades obxecto do presente convenio, en beneficio do colectivo incluído no ámbito de



aplicación da federación, o día da Discapacidade.

Cuarta.- XUSTIFICACIÓN

A FAXPG deberá acreditar, antes do 23 de decembro de 2026, a realización do obxecto do convenio por importe máximo de 5.000,00 € mediante a achega de facturas, nóminas ou outros documentos.

En todo caso, a Consellería de Presidencia, Xustiza e Deportes resérvase o dereito de solicitar a documentación que considere precisa en relación coa realización das actuacións obxecto do presente convenio e calquera outra que estime oportuna para a correcta xustificación do gasto e o seu pagamento.

Quinta.- RELACIÓN ENTRE AS PARTES

A sinatura do presente convenio non supón relación laboral, contractual ou de calquera tipo entre as persoas profesionais que vaian desenvolver as actividades e a entidade que o asina, de tal xeito que non se lle pode esixir responsabilidade ningunha directa nin subsidiaria polos actos ou feitos acontecidos no desenvolvemento do mesmo.

Sexta. - SEGUIMIENTO DO CONVENIO

Para facilitar o seguimento e cumprimento do convenio, constituirase unha comisión mixta paritaria, integrada por unha persoa representante da Consellería de Presidencia, Xustiza e Deportes, que exercerá a presidencia e



terá voto dirimente e outra representante da FAXPG, que ostentará a Secretaría da dita comisión.

A comisión mixta ditará as súas propias normas de funcionamento, debéndose reunir cando o solicite algunha das partes.

As súas funcións serán:

- Interpretación do convenio
- Estudar as posibles modificacións do convenio propostas polas partes, que se formalizarán a través das correspondentes addendas.
- Intervención previa á resolución por incumprimento
- Coordinación das funcións das dúas entidades
- Calquera outras relacionadas co desenvolvemento deste convenio.

Sétima .- PUBLICIDADE

Este convenio será obxecto de publicación de acordo co previsto na Lei 1/2016, do 18 de xaneiro, de transparencia e bo goberno da Administración pública galega. Así mesmo, incluírase no Rexistro Público de Axudas, Subvencións e Convenios, de conformidade co Decreto 132/2006, do 27 de xullo, polo que se regulan os rexistros públicos creados nos artigos 44 e 45 da Lei 7/2005, do 29 de decembro, de orzamentos xerais da Comunidade Autónoma para o ano 2006.

As partes asinantes do convenio manifestan o seu consentimento para que os datos persoais que constan neste convenio, así como o resto das especificacións



contidas no mesmo, poidan ser publicados no Portal da Transparencia e Goberno Aberto e no Rexistro de Convenios da Xunta de Galicia.

Oitava.- DURACIÓN

A vixencia deste convenio de colaboración estenderase dende a súa sinatura ata o 30 de decembro de 2026.

Novena.- CAUSAS DE RESOLUCIÓN

Serán causas de resolución do presente convenio:

- a) A denuncia do convenio de colaboración por calquera das dúas partes.
- b) O incumprimento total ou parcial dalgunha das cláusulas do presente convenio.
- c) O transcurso do tempo estipulado sen que se teñan realizado as actividades acordadas.
- d) Por acordo unánime de todas as persoas asinantes.
- e) Por decisión xudicial declaratoria da nulidade do convenio.
- f) Por calquera outra causa distinta das anteriores prevista no convenio ou noutras leis.

Décima.- INCUMPRIMENTOS, REINTEGROS E SANCIÓN

Producirase a perda do dereito ao cobro total ou parcial do importe do convenio ou o reintegro das cantidades percibidas, xunto co correspondente xuro de demora, nos seguintes casos:



- a) Falseamento de calquera das condicións necesarias para asinar e cumprir o convenio, ou ocultamento das condicións que poderían impedir a sinatura.
- b) Incumprimento total ou parcial do convenio ou non adopción do comportamento que fundamenta o obxecto do mesmo.
- c) Incumprimento da obriga de xustificación ou a xustificación insuficiente.
- d) Incumprimento da obriga de adoptar as medidas de difusión tal e como se recollen neste convenio.
- e) Resistencia, escusa, obstrución ou negativa ás actuacións de comprobación e control financeiro, así como o incumprimento das obrigas contables, rexistrais ou de conservación de documentos cando diso derive a imposibilidade de verificar o emprego dado aos fondos percibidos, o cumprimento do obxectivo, a realidade e regularidade das actividades prestadas, ou a concorrencia de outro tipo de capital, axudas ou ingresos ou recursos para a mesma finalidade deste convenio, procedentes de calquera administración ou entes públicos ou privados, estatais, da Unión Europea ou de organismos internacionais.
- f) Incumprimento das obrigas impostas pola administración, así como dos compromisos asumidos, sempre que afecten ou se refiran ao modo no que se conseguen os obxectivos, se realiza a actividade, se executa o proxecto.
- g) Incumprimento das obrigas impostas pola administración, distintos dos anteriores, cando diso derive a imposibilidade de verificar o emprego dado aos fondos percibidos, o cumprimento do obxectivo, a realidade e regularidade das actividades realizadas, ou a concorrencia de outras axudas, ingresos ou recursos para a mesma finalidade, procedentes de calquera administración ou entes públicos ou privados, estatais, da Unión Europea ou de organismos internacionais.



h) Adopción, en virtude do establecido nos artigos 87 a 89 do Tratado da Unión Europea, dunha decisión da cal derive unha necesidade de reintegro.

Nestes casos, o procedemento iniciarase de oficio por acordo do órgano competente, cun prazo máximo para notificar e resolver de seis meses, dende a data do acordo de inicio. En caso de silencio, producirase a caducidade do procedemento, sen prexuízo de continuar a súa tramitación ata o seu fin e sen que se considere as causas de interrupción da prescrición.

Sempre que non se cumpran os requisitos ou condicións esenciais reflectidos no convenio, a Consellería de Presidencia, Xustiza e Deportes poderá apreciar un incumprimento parcial e deberá resolver sobre o seu alcance, aplicando a mesma ponderación que tivera a condición incumprida no convenio e, se é o caso, establecendo o deber de reintegro.

Cando se trate de condicións referentes á contía ou conceptos do obxecto do convenio, o alcance do incumprimento determinarase proporcionalmente ao gasto deixado de practicar ou aplicado a conceptos distintos dos considerados neste instrumento e, se é o caso, deberán reintegrarse as cantidades percibidas na dita proporción. Con carácter xeral, se o incumprimento superara o 65% da actividade a prestar, entenderase que o dito incumprimento é total, e deberán reintegrarse todas as cantidades percibidas e o seus xuros de demora.

De acordo ao establecido no artigo 49.e) da Lei 40/2015, do 1 de outubro, para a posible indemnización por incumprimento teranse en conta os seguintes criterios: gravidade do prexuízo causado á outra parte, relación causal directa



entre o incumprimento e a produción dos danos, posibilidade de reparación, circunstancias concorrentes. Tamén se terá en conta o grao proporcional de execución realizado.

En todo caso, serán infraccións leves as seguintes:

- Presentación fóra de prazo da conta xustificativa ou presentación incompleta ou errónea.
- Resistencia ao control financeiro por parte da Administración.
- Levanza de contabilidade diversa da mesma actividade, non aportar os libros de contabilidade, no seu caso.
- Non contestar aos requirimentos da Administración.
- Calquera outro incumprimento das obrigas formais deste Convenio.

Incórrese en infracción grave non seguintes supostos:

- Falta de comunicación de axudas para a mesma finalidade que este convenio.
- Falta de xustificación dos fondos recibidos.
- Incumprimento da normativa europea correspondente.

Infraccións moi graves:

- Falseamento de documentación ou similar para acreditar as obrigas derivadas deste convenio, cando non sexa causa de resolución.
- Non se destinan as cantidades percibidas froito deste convenio, en todo ou parte, aos fins sinalados no mesmo.



- A resistencia á verificación e control por parte da administración impide a posibilidade de verificar o destino dos fondos entregados.
- Calquera outra actuación contraria á boa fe.

Décimo primeira.- MODIFICACIÓN DO CONVENIO

As causas polas que se pode modificar o presente convenio son:

1. Por acordo unánime das persoas asinantes.
2. De acordo co artigo 31.4 da Lei 14/2013, de 26 de decembro, de racionalización do sector público autonómico, cando teña como finalidade o logro dos obxectivos de estabilidade e sustentabilidade financeira.

Décimo segunda.- NATUREZA E RÉXIME XURÍDICO APLICABLE

O presente convenio ten carácter administrativo, rexéndose os seus efectos polo establecido nas cláusulas do mesmo. No seu defecto, estarase ao disposto polo Acordo adoptado polo Consello da Xunta de Galicia na súa reunión do 27 de marzo de 1991 e feito público mediante Resolución da Consellería de Economía e Facenda do 8 de abril de 1991, sobre convenios de cooperación con outros entes públicos e de colaboración con particulares; pola Lei 40/2015, de 1 de outubro de réxime xurídico e do Sector Público, a Lei 19/2013, de 9 de decembro, de transparencia, acceso á información pública e bo goberno, e pola demais normativa xeral que lle sexa de aplicación.



A Administración gozará de todas as prerrogativas inherentes á natureza administrativa do convenio. As cuestións litixiosas xurdidas acerca da interpretación, modificación ou efectos do convenio serán resoltas en última instancia pola Consellería de Presidencia, Xustiza e Deportes, poñendo os seus acordos fin á vía administrativa.

Contra a resolución que poña fin á vía administrativa poderá interpoñerse recurso contencioso-administrativo segundo o disposto na Lei 29/1998, do 13 de xullo, reguladora da xurisdición contencioso-administrativa ante o Tribunal Superior de Xustiza, sen prexuízo da interposición do recurso potestativo de reposición, de conformidade co disposto nos artigos 123 e 124 da Lei 39/2015 do 1 de outubro do procedemento administrativo común das administracións públicas.

Décimo Terceira.- PROTECCIÓN DE DATOS

As partes asinantes virán obrigadas en materia de protección de datos a cumprir co Regulamento (UE) 2016/679 do Parlamento Europeo e do Consello, do 27 de abril de 2016, relativo á protección das persoas físicas no que respecta ao tratamento de datos persoais e á libre circulación destes datos e polo que se derroga a Directiva 95/46/CE (Regulamento xeral de protección de datos), coa Lei orgánica 3/2018, do 5 de decembro, de protección de datos persoais e garantía dos dereitos dixitais e coas demais disposicións vixentes sobre a materia.



E para que quede constancia asinan o presente convenio no lugar indicado no encabezado e na data da súa sinatura dixital.

O conselleiro de Presidencia, Xustiza e
Deportes

Diego Calvo Pouso

A presidenta de FAXPG

María Alonso Mesía

